

平鎮二鯤身隙間遁去占城占城屬廣南今尚有道乾遺種道乾既遁澎之駐師亦罷因設巡檢守之既以海天遙阻裁棄天啓元年漢人顏思齊為東洋國甲螺東洋即今日本甲螺即頭目之類荷蘭紅毛舟遭颶風飄此愛其地借居于土番不可乃給之曰得一牛皮地足矣多金不惜遂許之紅毛剪牛皮如縷周圍圈匝已數十丈因築臺灣城鎮即安平城居之已復築赤嵌城即紅毛樓與相望設市於城外而漳泉之商賈集焉

國朝順治六年庚寅甲螺郭懷一謀遂紅毛事覺被戮辛丑鄭芝龍子成功自江南敗其勢日蹙孤軍廈門適甲螺何斌負債逃廈誘成功取臺地舟至鹿耳門水忽漲數丈時大霧駢進而入紅毛不虞鄭舟猝至意天假手于鄭以式廓我朔無外之疆域也荷蘭歸一王以死拒戰成功告之曰此地先人故物今珍寶聽而載歸地仍還我一王知不敵乃率紅毛遁去成功遂入據之改臺灣為安平鎮赤嵌為承天府總名東都設縣二曰天興曰萬年成功死子經嗣改東都為東寧二縣為二州設安撫司三南北路澎湖各一興市塵教耕種漸近中國風土矣辛酉經死子克塽嗣

康熙二十一年福建總督姚啓聖深知虛實用間諜陰散其黨約傳為霖為內應垂成事洩為霖遇害啓聖仰遵廟算定策平臺二十二年靖海將軍侯施琅統舟師進征六月由銅山直抵澎湖八罩澳取虎井桶盤與戒軍士毋得妄殺軍士若水鹹島岸突湧甘泉遂無渴患一戰而澎湖平克塽震懾天威遂籍府庫納地歸誠二十三年廷議設府一曰臺灣屬福建布政使司領縣三附郭曰臺灣外二縣曰鳳山諸羅雍正元年巡察吳達禮黃叔璥摺奏割諸羅虎尾溪以北增設縣一奉旨俞允賜名曰彰化今領縣四

〔臺灣府志〕二十卷東寧十詠

其二

高拱乾○中略

曉來吹角徹蒼茫鹿耳門邊幾戰場流毒猶傳日本國偏安空比夜郎王臺地先為倭奴所踞樓船將旋歸荷蘭後屬鄭氏